

KONSEP WAKAF KESIHATAN & PERKEMBANGANNYA DI MALAYSIA

HEALTH WAQF CONCEPT & ITS DEVELOPMENT IN MALAYSIA

Ainul Kauthar Binti Karim¹;
Arieff Salleh Rosman²;
Azman Ab Rahman³

ABSTRAK

Wakaf merupakan salah satu bentuk ibadah kepada Allah dan mempunyai peranan penting dalam menyelesaikan masalah umat Islam hari ini seperti pembasmian kemiskinan, kesihatan, pendidikan, pusat rumah anak yatim, masjid dan kediaman bagi masyarakat yang memerlukan. Walaubagaimanapun, artikel ini hanya memberikan fokus kepada peranan wakaf berkaitan isu kesihatan yang timbul kesan daripada kos perubatan yang tinggi yang menyebabkan ramai orang Islam tidak mampu untuk mendapatkan rawatan yang terbaik. Oleh itu, kajian ini bertujuan untuk membincangkan konsep wakaf kesihatan secara umum, seterusnya mengenalpasti bentuk pengurusan wakaf yang sudah sedia ada di Malaysia serta memperkenalkan kerangka asas wakaf kesihatan yang terdapat di Malaysia. Kajian ini merupakan kajian kualitatif dengan menggunakan kaedah analisis kandungan. Data dikumpulkan daripada artikel dan buku yang dikarang oleh para sarjana, dan seterusnya dianalisa menggunakan kaedah fiqh muqaran. Dapatan kajian ini mendapati terdapat potensi yang tinggi untuk membangunkan wakaf kesihatan bagi menyelesaikan isu kesihatan orang Islam di Malaysia.

Kata Kunci : Wakaf Kesihatan, Pengurusan Wakaf, Peranan Wakaf

ABSTRACT

Waqf is a form of worship to God and have an important role in solving the problems of the Muslims today such as poverty alleviation, health, education center, orphanages, mosques and homes for people in need. However, this article only focused on the role of waqf related health issues arising from the impact of high medical costs are causing many Muslims are not able to get the best care . Therefore, this study aimed to discuss the concept of health waqf generally, then identify the form of existing waqf in Malaysia as well as introducing the basic concept of health waqf in Malaysia. This study is a qualitative study using content analysis. Data collected from books and articles written by scholars, and thus analyzed using muqaran maxims. This study found that there is a high potential to develop health endowment or waqf to resolve health issues Muslims in Malaysia.

Keywords: *Waqf Of Health, Waqf Management, Role Of Waqf*

¹ Pelajar Sarjana Falsafah, di Fakulti Tamadun Islam, Universiti Teknologi Malaysia, Johor Bahru, Johor.
Email penulis koresponden: ainulkauthar.karim@gmail.com(013-2506169)

² Pensyarah Kanan di Fakulti Tamadun Islam dan Pengarah di Pusat Penyelidikan Fiqh Sains & Teknologi (CFIRST) Universiti Teknologi Malaysia, Johor Bahru, Johor.

³ Pensyarah Kanan di Fakulti Syariah & Undang-undang, Universiti Sains Islam Malaysia, Nilai, Negeri Sembilan.

1. PENDAHULUAN

Umat Islam adalah bersaudara dan digambarkan sebagai satu bangunan yang saling sokong-menyokong antara satu sama lain. Penzahiran persaudaraan itu bukan semata-mata dalam bentuk pertolongan daripada aspek tenaga atau bantuan lain, malah Islam mengajar umatnya supaya tolong-menolong dan bantu-membantu dalam bentuk wang dan harta benda. Bantuan dan pemberian wang dan harta benda ini bukan kerana mahukan sesuatu daripada manusia, tetapi kerana mahukan keredhaan Allah. Oleh itu selain zakat, hibah dan sebagainya, umat Islam akan berkongsi harta kekayaannya dengan orang lain melalui berwakaf.

Wakaf merupakan satu amalan sunat dan digalakkan, bahkan boleh menjadi wajib dilaksanakan apabila diwasiatkan. Oleh kerana umat Islam berwakaf kerana mahukan keredaan Allah, maka wakaf merupakan satu mekanisme perkongsian harta kekayaan seseorang dengan orang lain yang mengundang keberkatan hidup. Pengagihan harta secara adil bagi memenuhi kepentingan pelbagai pihak adalah sangat penting bagi menjamin kestabilan dan pembangunan ekonomi Negara.

Wakaf merupakan salah satu instrumen perolehan dan pengagihan hasil negara Islam. Berdasarkan tajuk artikel ini, ia perlu dilihat secara dekat bagi membincangkan konsep berkaitan wakaf, seterusnya mengenalpasti bentuk wakaf yang telah dijalankan di Malaysia dan bagaimana wakaf berperanan dalam menyelesaikan isu kesihatan orang Islam di Malaysia.

2. KAJIAN LITERATUR

Melalui pemerhatian yang dibuat, terdapat beberapa kajian dan penulisan yang berkaitan dengan apa yang ingin dikaji. Antara kajian-kajian terdahulu adalah seperti berikut:

Kajian yang dibuat oleh Asmak Ab Rahman mengenai '*Peranan Wakaf Dalam Pembangunan Ekonomi Umat Islam dan Aplikasinya di Malaysia*' memperlihatkan bahawa sesungguhnya terdapat banyak peranan dan sumbangan wakaf dalam penyediaan pendidikan, keperluan perumahan, kemudahan kesihatan, pergerakan kegiatan ekonomi, tempat peribadatan, sektor pertanian, kebajikan anak yatim dan pembasmian kemiskinan. Walaupun artikel ini telah menjelaskan pelbagai peranan wakaf tetapi penulis tidak menyebutkan secara khusus cara dan bentuk peranan wakaf dalam bidang kesihatan.

Terdapat kajian yang banyak mengupas pada wakaf pendidikan seperti penulisan Syed Mohd. Ghazali Wafa bertajuk '*Pembangunan Wakaf Pendidikan di Malaysia*'. Kajian ini lebih tertumpu kepada perkembangan dan peranan wakaf dalam bidang pendidikan semata-mata berikutan yuran dan kos pendidikan yang meningkat dewasa ini.

Kajian serupa mengenai peranan wakaf ini ialah menurut Norsiah Bt Sulaiman & Farahdina Abdul Manaf dalam penulisan mereka bertajuk "*Peranan Harta Wakaf dalam Bidang Pembangunan dan Pendidikan Ummah: Fokus dalam Bidang Perubatan*" membincangkan usaha mewujudkan wakaf pendidikan khususnya dalam bidang perubatan bagi kemudahan pelajar Perubatan bagi meneruskan pengajian mereka dalam bidang ini. Penulis turut memaparkan kejayaan sumbangan wakaf dalam pembangunan hospital dan perkhidmatan perubatan zaman Khalifah Harun al-Rashid dengan mendirikan sekolah perbidanan dan melantik al-Masawaih sebagai Menteri Kesihatan dan Doktor Istana. Penulis turut memaparkan terdapat hospital bersalin yang bersumberkan wakaf seperti Hospital al-

Muqtadiri, al-‘Atiq dan al-Mansori. Walaubagaimanapun, ia adalah di zaman-zaman kegemilangan Islam pada suatu ketika dahulu bukan pada zaman kini di Malaysia.

Seterusnya, kajian yang telah dilakukan oleh Abdul Halim Ramli dan Kamarulzaman Sulaiman dalam kertas kerja yang telah mereka bentangkan dalam Konvensyen Wakaf Kebangsaan 2006 berjudul '*Pembangunan Harta Wakaf: Pengalaman Negara-negara Islam*' bahawa terdapat juga pembangunan wakaf kesihatan yang telah dilakukan oleh negara-negara seperti India, Bangladesh, Kuwait. Walaupun hospital wakaf itu tidak berjaya pada akhirnya, namun langkah untuk membangunkan wakaf kesihatan itu tetap ada dan masih boleh dicontohi. Kajian mereka telah menjelaskan serba sedikit tentang mekanisma harta wakaf yang telah berjaya dibangunkan dan memberikan sumbangan yang penting kepada umat Islam di negara-negara terbabit.

Sepanjang penelitian kajian ini, penyelidik merumuskan bahawa masih terdapat banyak ruang dalam bidang kesihatan yang perlu diterokai dan dikembangkan untuk menyelesaikan masalah kesihatan orang Islam di Malaysia. Justeru, adalah perlu dijalankan kajian lebih mendalam dan lebih fokus berhubung hal tersebut terutamanya kepada pengaplikasian wakaf dalam bidang kesihatan. Hal ini bukan sahaja mampu menyelesaikan masalah yang dihadapi oleh golongan kurang berkemampuan, bahkan dapat memecahkan tembok persepsi masyarakat untuk tidak lagi melihat wakaf ini hanya dalam konteks sempit iaitu hanya berkaitan tanah kubur, masjid, surau atau sekadar tanah terbiar.

3. METODOLOGI KAJIAN

Kajian ini menggunakan kaedah kualitatif sepenuhnya. Penyelidikan kualitatif bertujuan memahami secara mendalam fenomena berkaitan persoalan kajian. Selanjutnya, Merriam dan Patton menegaskan penggunaan kaedah kualitatif dalam sesuatu penyelidikan bertujuan memahami secara holistik pengalaman manusia dalam sesuatu konteks. Oleh itu, menurut Merriam, penyelidikan kualitatif adalah berbentuk induktif. Penyelidik menggunakan pendekatan kualitatif untuk meneroka penulisan sarjana berkaitan konsep wakaf kesihatan di Malaysia secara umum, bentuk wakaf di Malaysia, dan kerangka asas wakaf kesihatan di Malaysia.

4. KONSEP WAKAF DI MALAYSIA

4.1 Maksud dan legaliti wakaf

Wakaf berasal dari Bahasa Arab 'waqf', iaitu nama terbitan dari kata kerja *waqafa*. Ia mempunyai pelbagai makna mengikut tujuan dan penggunaan ayat itu sendiri. Dari segi Bahasa, wakaf bermaksud berhenti (السكن), menegah (المنع) atau menahan (الحبس). Wakaf ialah suatu bentuk penyerahan harta sama ada secara terang, atau senyap, di mana harta berkenaan ditahan dan hanya manfaatnya sahaja yang diaplikasikan untuk tujuan-tujuan kebajikan sama ada berbentuk umum mahupun khusus. Menurut Syeikh Muhammad al-Syarbini al-Khatib; seorang ulama bermazhab Syafi'i, wakaf bermaksud "menahan harta yang boleh memberi manfaat dengannya, serta kekal fizikal harta, dengan melupakan hak pengurusan yang dimiliki oleh pewakaf untuk diberi kepada pihak yang dibenarkan oleh Syarak yang wujud ketika itu."

Maksud wakaf sebagai "menahan harta yang boleh memberi manfaat dengannya," mengekalkan harta yang diwakafkan dan tidak boleh dipindah milik fizikal harta itu sama ada melalui jual beli, dihadiahkan kepada pihak ketiga, pewarisan atau gadaian. Ini bermaksud,

harta yang sudah diwakafkan itu tidak boleh dijual beli, dihadiahkan, diwarisi atau digadai. Manakala manfaat daripada harta yang diwakafkan itu boleh dimanfaatkan oleh pihak yang dinyatakan oleh pewakaf.

Syarat harta yang hendak diwakafkan ialah "kekal fizikal harta" yang bermaksud harta tersebut hendaklah daripada jenis harta yang tidak mudah rosak atau musnah, seperti tanah, bangunan dan sebagainya. Wakaf juga bermaksud "melupakan hak pengurusan yang dimiliki oleh pewakaf," ini disebabkan pada asalnya pewakaf yang menjadi pemilik harta diberikan hak untuk mengurus harta itu oleh Syarak, seperti menjual harta itu, mengguna, menghadiahkan dan sebagainya. Tetapi apabila harta itu sudah diwakafkan, maka hak pengurusan itu dilupakan. Pewakaf sudah tidak memiliki hak untuk mengurus harta tersebut. Sebab itu beliau tidak boleh menjual, menghadiahkan, mewariskan atau menggadai harta tersebut. Kenyataan ini juga menjelaskan, pengurus dan penerima harta wakaf hanya memiliki hak mengurus manfaat harta, bukan memiliki jasad harta. Kerana jasad harta itu sudah dimiliki oleh Syarak.

Penerima harta wakaf mestilah "pihak yang dibenarkan oleh Syarak yang wujud ketika itu." Wakaf tidak boleh diberikan kepada pihak yang dilarang oleh Syarak seperti mewakafkan harta untuk melakukan maksiat. Penerima wakaf juga mestilah wujud ketika wakaf itu dilakukan.

Wakaf bermaksud menahan *'ayn mawquf* (harta) sebagai milik Allah atau pada hukum milik Allah dan menyedekahkan manfaatnya ke arah kebajikan dari mula hingga akhirnya. Ini selaras dengan firman Allah SWT:

عَلَيْكُمْ بِهِ ۚ أَلَمْ تَعْلَمُوا أَنَّ شَيْءًا مِّنْ تُنْفِقُوا أَوْ مَا تَحِبُّونَ مِمَّا تُنْفِقُونَ ۚ إِنَّ الْبَرَّ تَنَالُونَ

Maksudnya: "Kamu sekali-kali tidak akan mencapai kebajikan yang sebenarnya sehingga kamu belanjakan sebahagian daripada harta yang paling kamu sayangi dan apa sahaja yang kamu belanjakan dari sesuatu, maka sesungguhnya Allah Maha Mengetahui."

(Surah Ali 'Imran, 3: 92)

Anas bin Malik melaporkan, "Abu Talhah adalah seorang penduduk asal Madinah yang paling banyak memiliki kebun kurma di Madinah. Antara kebun kurma yang paling beliau sayang ialah kebun kurmanya yang terletak di sebuah kawasan bernama Bairuha'. Ia terletak berhadapan dengan sebuah masjid. Rasulullah s.a.w. pernah mengunjungi kebun tersebut dan meminum air daripada telaga yang berada di situ. Air telaga kebun tersebut begitu nyaman dan menyegarkan. Apabila Abu Talhah mendengar, Allah telah menurunkan ayat 92 surah Ali 'Imran, Abu Talhah terus pergi berjumpa dengan Rasulullah s.a.w. Abu Talhah berkata, 'Harta yang paling saya sayang ialah kebun kurma saya yang terletak di Bairuha'. Saya wakafkan kebun itu ke jalan Allah.'" Hadis sahih direkodkan oleh Imam al-Bukhari.

4.2 Kategori Wakaf di Malaysia

Pada awalnya, bentuk perwakafan di Malaysia hanya tertumpu kepada wakaf am dan wakaf khas sahaja. Namun, seiring dengan perkembangan teknologi dan masa, terdapat pelbagai bentuk perwakafan yang kita boleh dapati hari ini. Antaranya adalah wakaf am, wakaf khas, wakaf wang, wakaf saham, wakaf takaful dan wakaf korporat.

1) Wakaf Am

Wakaf am merupakan wakaf yang asal dan thabit dalam nas, seperti yang dipersetujui oleh jumhur ulama'. Ia bersifat pengorbanan dan amal jariyah untuk fakir miskin dan fi sabilillah. Menurut peruntukan undang-undang di Malaysia, wakaf am bermaksud "sesuatu wakaf yang diwujudkan bagi tujuan khairat umum menurut Hukum Syarak".

Wakaf ini merupakan mana-mana bentuk dedikasi wakaf yang dibuat untuk tujuan-tujuan kebajikan atau khairat umum tanpa menentukan mana-mana benefisiari khusus (sama ada terdiri daripada individu ataupun mana-mana organisasi/institusi) ataupun tujuan khusus yang tertentu. Perwakafan daripada kategori ini boleh diaplikasikan kepada perkara atau tujuan kebajikan umum yang dapat meningkatkan lagi imej Islam dan masyarakatnya. Serta pewakaf tidak mensyaratkan sebarang syarat kepada harta yang diwakafkan.

2) Wakaf Khas

Wakaf Khas pula merujuk kepada suatu bentuk dedikasi harta sama ada secara terang atau sindiran, tujuan pewakafatannya telah ditentukan sejak awal lagi oleh seseorang pewakaf. Menurut peruntukan undang-undang, wakaf khas bermaksud "sesuatu wakaf yang diwujudkan bagi tujuan khairat khusus menurut Hukum Syarak". Dalam perwakafan khas, seseorang pewakaf menetapkan daripada awal lagi kepada siapakah wakafnya dibuat atau untuk tujuan manakah wakafnya mesti diaplikasikan. Sebagai contoh, pewakaf mewakafkan tanah untuk dijadikan tanah perkuburan atau sekolah ataupun mewakafkan tanah untuk orang miskin.

3) Wakaf Wang atau Wakaf Tunai

Wakaf wang atau lebih dikenali sebagai wakaf tunai pula adalah wakaf yang menggunakan mata wang demi manfaat umat Islam secara umum, menggunakan wang tunai yang dikumpul di dalam satu tabung amanah di bawah pengurusan nazir yang diamanahkan untuk mengurus wakaf ini bagi tujuan kebajikan dan manfaat ummah. Para ulama di zaman silam telah menggunakan istilah *wakaf ad-darahim* atau *wakaf ad-dananir* iaitu wakaf menggunakan wang dirham atau dinar dalam kehidupan mereka. Namun ulama menetapkan bahawa seandainya penggunaannya menyebabkan menjadi habis, maka mata wang tidak boleh dijadikan harta wakaf. Imam Az-Zuhri telah memfatwakan bahawa berwakaf dalam bentuk dinar dan dirham adalah diharuskan bagi tujuan berdakwah, kebajikan ummah dan pendidikan umat Islam. wang tunai lebih mudah diuruskan berbanding harta tetap seperti tanah dan sebagainya.

Secara umumnya wakaf tunai ini dilaksanakan adalah bertujuan untuk mengumpulkan dana dari kalangan umat Islam yang kemudiannya dapat dimanfaatkan bagi kepentingan pembangunan dan kebajikan ummah. Bentuk fizikalnya yang mudah alih memungkinkan fungsinya dipelbagaikan. Menurut catatan sejarah, Empayar Uthmaniyah di Turki mencapai kegemilangan dengan bantuan amalan wakaf tunai yang meluas ketika itu sehingga berjaya meringankan perbelanjaan kerajaan serta menjadi pelengkap kepada usaha-usaha pembangunan dalam penyediaan kemudahan-kemudahan perkhidmatan pendidikan, kesihatan, perbandaran dan seumpamanya kepada masyarakat Turki.

4) Wakaf Saham

Setelah pendekatan wakaf tunai sudah mula diamalkan, terbitlah konsep wakaf saham pula. Melalui skim wakaf saham ini, Majlis Agama Islam Negeri bertindak sebagai pemegang amanah dan peserta perlu membeli saham-saham wakaf tadi kemudian mewakafkannya. Wang sumbangan jualan saham akan dikumpulkan di bawah satu dana khas dan akan disalurkan kepada program berbentuk ekonomi, pendidikan, sosial dan am, bergantung kepada pilihan yang dibuat oleh peserta. Walaupun secara amnya skim wakaf saham ini juga merupakan satu bentuk wakaf tunai, tetapi ia dibataskan kepada projek-projek tertentu sahaja dan wang tersebut tidak dikembangkan secara terus melalui instrumen-instrumen pelaburan moden. Ini mungkin disebabkan kekurangan kepakaran mahupun dari segi sumber dana yang terkumpul.

Sebagai contoh, wakaf saham yang diamalkan oleh Majlis Agama Islam Johor (MAIJ) adalah saham-saham wakaf yang mempunyai nilai tertentu akan ditawarkan kepada orang ramai untuk dibeli dan dikumpulkan bagi mewujudkan dan membangunkan harta-harta wakaf yang dilabur. Dengan cara ini, individu yang tidak mempunyai harta atau tidak mampu untuk mendapatkan harta untuk diwakafkan dapat melaksanakan ibadat wakaf ini secara kolektif. Selain negeri Johor, antara yang mengamalkan wakaf saham ini adalah Majlis Agama Islam Negeri (MAIN): Melaka, Selangor, Pahang dan Pulau Pinang serta Yayasan Pembangunan Ekonomi Islam Malaysia (Yapeim).

5) Wakaf Takaful

Wakaf takaful ini berkonsepkan wakaf dalam takaful. Mekanisma perlaksanaannya ialah satu tabung wakaf perlu ditubuhkan terlebih dahulu oleh pengendali takaful atau syarikat. Tabung wakaf ini diadakan hasil daripada sebahagian modal syarikat yang diwakafkan untuk peserta-peserta yang ditimpa musibah mengikut peraturan-peraturan penggunaan dana. Dana dalam tabung wakaf ini juga akan dilaburkan sama seperti model-model yang lain iaitu model mudharabah, model wakalah ataupun model *hybrid*. Jumlah wang yang diwakafkan ini, dilaburkan berasaskan konsep mudharabah, di mana keuntungannya dimasukkan ke dalam tabung khas untuk tujuan pelaksanaan matlamat-matlamat wakaf.

Dana takaful merupakan satu entiti yang sah di sisi undang-undang yang memungkinkannya memiliki harta dan melakukan pelaburan serta memberi pemilikan kepada orang lain berdasarkan peraturan yang ditetapkan. Dana ini tidak dimiliki oleh mana-mana pihak. Sebarang pihak yang ingin mendapatkan perlindungan takaful boleh menyertai keanggotaan dana dengan cara melakukan sumbangan mengikut peraturan yang ditetapkan. Sebarang sumbangan daripada peserta akan menjadi milik dana wakaf. Sumbangan yang diberikan tidak dikira sebagai harta wakaf, namun dianggap sebagai hak milik sumber wakaf. Oleh hal yang demikian, jumlah sumbangan tersebut tidak wajib disimpan sebagaimana wang wakaf. Sumbangan tersebut akan dilaburkan untuk masalah dana, dan kemudian dibelanjakan bersama-sama dengan keuntungan untuk pembayaran pampasan dan tujuan-tujuan wakaf yang lain.

Dalam keadaan ini, Muhammad Taqi Usmani berpendapat bahawa model wakaf sebenarnya lebih selari dengan konsep asas Takaful yang menggambarkan rancangan perlindungan berasaskan kepada hubungan persaudaraan insan, rasa saling bertanggungjawab dan saling

bekerjasama dalam kalangan peserta. Hal ini demikian kerana dana wakaf adalah dikumpulkan berdasarkan sumbangan awal daripada modal peserta untuk membantu umat Islam yang memerlukan. Beliau menganggap dana model wakaf ini sebagai entiti yang sah di sisi undang-undang, sedangkan dana takaful sememangnya mempunyai status entiti undang-undang. Sumbangan dana ini bukan berasaskan keuntungan tetapi dikendalikan untuk menjaga kebajikan bersama, di mana penyumbang rela memberikan kepada ahli masyarakat yang kurang bernasib baik.

6) Wakaf Korporat

Bentuk wakaf yang paling kontemporari di negara ini ialah pelaksanaan wakaf korporat yang diperkenalkan oleh Johor Corporation Berhad (JCorp). Wakaf korporat ini dipercayai merupakan yang pertama dilaksanakan oleh sebuah institusi bisnes korporat di dunia. Ia diuruskan oleh anak syarikatnya iaitu Waqaf An-Nur Corporation Berhad (WANCorp) yang merupakan sebuah syarikat berhad dengan jaminan JCorp sendiri. WANCorp ditubuhkan untuk menguruskan aset dan saham-saham syarikat kumpulan JCorp yang diwakafkan di samping berperanan sebagai '*maukuf alaihi*' ke atas semua saham-saham dan lain-lain bentuk sekuriti syarikat JCorp.

5. KERANGKA KONSEP WAKAF KESIHATAN

Sejarah membuktikan bahawa wakaf memainkan peranan yang sangat signifikan dalam pembangunan kesihatan sesebuah negara. Institusi perubatan dalam tamadun Islam seperti klinik, hospital, klinik-klinik bergerak dan hospital-hospital universiti ditubuhkan kebanyakannya dengan biaya wakaf. Begitu juga perkhidmatan perubatan sepertimana rumah-rumah penginapan musafir (seperti asrama dan hotel) pusat-pusat sufi, masjid-masjid dan institusi pendidikan banyak bergantung kepada bantuan dari wakaf.

Hospital bukan saja didirikan oleh pemerintah tetapi juga oleh individu perseorangan sebagai sumbangan dalam bentuk wakaf kepada orang ramai. Individu lain yang ingin memberi sumbangan membantu dengan mewakafkan keperluan-keperluan lain. Contohnya Ibn Toulon telah mendirikan sebuah hospital untuk mereka yang kurang berkemampuan di Kaherah pada tahun 913M.

Institusi perubatan perbidanan dan sakit puan telah didirikan di kota-kota seperti Harran, Baghdad dan Jundishapur. Hospital bersalin terbesar telah didirikan di kota Baghdad oleh Khalifah Harun al-Rashid. Baginda juga mendirikan sekolah perbidanan dan melantik al-Masawaih sebagai Menteri Kesihatan dan Doktor Istana. Manakala di kota Rayy didirikan hospital bersalin terbesar untuk seluruh Parsi. Antara hospital terkenal dalam Islam ialah hospital al-Muqtadiri, al'Atiq dan al-Mansori. Hospital-hospital ini semuanya dibiaya dan diuruskan melalui sumber wakaf.

Al-Qalqashandi (meninggal 1418M) telah menulis bahawa pada abad ke-14 di Delhi dan kawasan sekitarnya di benua India, terdapat lebih daripada 1,000 buah sekolah dan maktab (madrasah) serta 700 buah hospital di samping 2,000 rumah rehat sufi dan tempat istirehat musafir yang semuanya dibina melalui biaya wakaf. Bilangan ini adalah amat mengagumkan ditambah lagi dengan pelbagai kemudahan yang mampu disediakan di tempat-tempat ini. Ruang-ruang dapur yang luas di rumah-rumah rehat dibuka kepada orang ramai dan selalunya berfungsi sebagai tempat penginapan fakir miskin. Hospital-hospital ini juga menyediakan

perkhidmatan percuma terutamanya kepada pesakit daripada golongan fakir miskin dan mereka juga dibenarkan tinggal di hospital, sekiranya tiada tempat tinggal.

Di samping itu, Lembaga Wakaf Kartanaka dibawah Kerajaan India telah membina Pusat Perubatan percuma khususnya untuk masyarakat Muslim yang miskin yang mempunyai 20 katil, bank darah dan makmal. Salah satu peranan utama Pusat Perubatan ini adalah mengerakkan program imunisasi, di mana ambulans dari pusat ini akan melawat beberapa daerah untuk memberi suntikan imunisasi, vitamin dan lain-lain bantuan perubatan khususnya untuk golongan kanak-kanak dan wanita.

Sebagaimana yang telah dibincangkan, kesihatan adalah satu petunjuk kepada pembangunan ekonomi maka kemudahan untuk mendapat perkhidmatan kesihatan oleh rakyat amat penting. Dalam konteks ini, walaupun di Malaysia terdapat hospital dan klinik yang disediakan oleh pihak kerajaan dan pihak swasta, institusi wakaf dilihat turut berperanan dalam menyediakan kesihatan dengan kos yang murah kepada masyarakat serta dapat menyelesaikan masalah kesihatan yang dihadapi oleh anggota masyarakat yang dhaif dan memerlukan bantuan.

Seseorang itu juga akan dianggap miskin sekiranya tidak mendapat akses kepada khidmat kesihatan. Impaknya, disebabkan kemiskinan mereka tidak dapat ke hospital. Kesannya apabila mereka tidak mendapat rawatan yang sepatutnya ketika sakit, kemungkinan sakit akan melarat dan memberi kesan jangka panjang dan jangka pendek. Kesan jangka pendek, mungkin mereka tidak dapat bekerja kerana masalah kesihatan. Kesan jangka panjang, ia akan menjejaskan hidup mereka sepanjang hayat.

Bagi ibu-ibu yang mengandung pula, sekiranya tidak mendapat rawatan sepanjang kehamilan atau selepas bersalin, ia akan memberi kesan kepada bayi dan ibu itu sendiri. Bayi mungkin akan menghadapi risiko kurang *nutritisi* dan sebagainya. Dengan adanya hospital atau klinik wakaf, akan membantu golongan miskin mendapat rawatan kesihatan secara percuma atau pada kadar bayaran yang rendah.

5.1 Kerangka Asas Wakaf Kesihatan di Negeri Johor

Salah satu model wakaf kesihatan yang sudah dilaksanakan di Malaysia, dipelopori oleh Klinik Waqaf An-Nur Johor. Wakaf ini mempromosikan produk sadaqah jariyah dalam kalangan masyarakat membabitkan antara lain sumbangan dalam bentuk dana wakaf secara tunai. Idea penubuhan Klinik Waqaf An-Nur ialah hasil kerjasama Johor Corporation menerusi Masjid An-Nur Kotaraya dan dengan kerjasama Majlis Agama Islam Johor (MAIJ).

Penubuhan rangkaian Klinik Waqaf An-Nur (KWAN) dan Hospital Waqaf An-Nur Pasir Gudang telah berjaya dalam merealisasikan matlamat Johor Corporation bagi membantu ramai masyarakat terutamanya golongan yang kurang berkemampuan terutamanya golongan berpendapatan di bawah RM800 sebulan menikmati kemudahan rawatan kesihatan menerusi konsep wakaf. Kesemua rangkaian Klinik Waqaf An-Nur ini turut menyediakan perkhidmatan dialisis dengan kadar subsidi iaitu hanya berjumlah RM 70 hingga RM 90 manakala untuk bayaran rawatan biasa hanya RM 5 sahaja termasuk kos ubat-ubatan. Jika sebelum ini, masyarakat yang tidak mampu untuk ke klinik swasta, kini mereka tidak perlu bimbang kerana setiap rawatan dan ubat-ubatan di Klinik Waqaf An-Nur hanya dikenakan bayaran RM5 sahaja. Menurut Pengurus Besar Pusat Perubatan Cawangan Klinik Waqaf An-

Nur Selangor; Mohd Johar Ismail berkata, bayaran yang dikenakan itu hanyalah sebagai token untuk mengelakkan daripada klinik tersebut disalah guna oleh sesetengah individu.

WanCorp terus berperanan dengan menyalurkan dana bagi pembinaan dan pembangunan Hospital dan Klinik Wakaf An-Nur (KWAN). Pada tahun 2012, WanCorp telah menyalurkan dana berjumlah RM 0.5 juta bagi menaiktaraf Pusat Dialisis di Hospital Waqaf An-Nur Pasir Gudang. Penaiktarafan Pusat Dialisis ini akan dapat memberikan lebih keselesaan kepada pesakit-pesakit buah pinggang. Seterusnya juga pertambahan mesin dialisis dapat menampung pertambahan bilangan pesakit buah pinggang yang boleh dirawat.

Pada tahun 2012 seramai 103,542 orang telah menerima rawatan di seluruh rangkaian KWAN. Daripada jumlah tersebut seramai 9,491 orang adalah pesakit bukan Islam. Bagi tempoh yang sama jumlah pesakit buah pinggang yang menerima rawatan dialisis di Hospital Waqaf An-Nur Pasir Gudang dan di 3 buah Klinik Waqaf An-Nur (Batu Pahat, Senawang dan Satok) adalah seramai 101 orang dengan jumlah mesin dialisis sebanyak 39 buah. Rangkaian Klinik Waqaf An-Nur akan terus berkembang di dalam dan luar Negeri Johor. Di negeri Selangor terdapat 5 buah lagi perancangan pembinaan KWAN dengan sebuah klinik bergerak manakala Negeri Sembilan, Perak, Pulau Pinang dan Kelantan sebuah KWAN akan dibuka yang mana kesemuanya dibangunkan oleh rangkaian hospital pakar KPJ Healthcare Berhad. Terkini, Klinik Waqaf An-Nur yang baru di Taman Bukit Tiram, Ulu Tiram, Johor juga telah dibuka pada pertengahan tahun 2013.

6. KESIMPULAN

Penubuhan Klinik Waqaf An-Nur dan Hospital Waqaf An-Nur Pasir Gudang adalah merupakan suatu model wakaf kesihatan yang dilihat pada masa kini mampu menyelesaikan masalah kesihatan umat Islam di Malaysia, selain sebahagian daripada usahasama syarikat swasta dan kerajaan negeri meringankan beban rakyat yang berhadapan dengan kenaikan kos sara hidup. Dalam masa yang sama, kita dapat melihat peranan wakaf itu sangat signifikan dalam menyelesaikan isu orang Islam terutamanya dalam bidang kesihatan umat Islam negara ini. Dengan penubuhan wakaf kesihatan yang menawarkan rawatan dengan kos yang sangat minimum dan bertujuan lebih kepada kebajikan semata-mata bukan keuntungan. Apabila semua golongan masyarakat mendapat kemudahan menerima rawatan kesihatan, maka dari sudut insani mereka turut mambangun. Ini kerana apabila mereka sihat dan bahagia, ia membuka taraf ekonomi keluarga mereka seterusnya dapat menyelesaikan masalah yang banyak melanda umat Islam kini.

RUJUKAN

Al-Quran Al-Karim.

Abdul Ghafar Ismail, 2009. *Halatuju Pengurusan Zakat & Wakaf di Malaysia*. Kertas kerja jemputan ini dibentangkan di Mukhtar Wakaf & Zakat bertempat di Kolej Universiti Insaniah, Alor Star, Kedah pada 30-31 Mei 2009.

Abdul Halim Ramli & Kamarulzaman Sulaiman. 2006. "Pembangunan Harta Wakaf : Pengalaman Negara-Negara Islam" (Kertas kerja dibentangkan di Konvensyen Wakaf 2006 di Hotel Legend, Kuala Lumpur, 12-14 September 2006)

Abdullah Jalil and Ashraf Mohd. Ramli. (2008). Waqf Instruments for Construction Contract: An Analysis of Structure. *The Journal of Muamalat and Islamic Finance Research (JMIFR)* 5: 14.

Ahmad Taha. 1992. *Kedokteran Islam*. Ismail Ibrahim (terj.). Kuala Lumpur: Dewan Bahasa dan Pustaka.

Ahmad Zaki Hj Abd Latiff, Che Zuina Ismail & Norzaidi Mohd Daud. 2006. Pengurusan Harta Wakaf Dan Potensinya Ke Arah Kemajuan Pendidikan Umat Islam Di Malaysia” (Kertas Kerja Konvensyen Wakaf 2006 di Hotel Legend, Kuala Lumpur, 12-14 September 2006).

Asharaf Mohd Ramli dan Abdullaah Jalil, (2013). *Funding Higher Education In Malaysia: Corporate Waqf Model*, Waqf Workshop: Contemporary Role of Higher Education, Alor Star: Al-Bukhari International University.

Asmak Ab Rahman. 2009. *Peranan Wakaf dalam Pembangunan Ekonomi Umat Islam & Aplikasinya di Malaysia*. Jurnal Syariah. Jilid 17. Bil. 1.

al-Asyqar, Umar Sulayman et. al. 1996. *Masa'il fi al-fiqh al-muqaran*. 'Amman: Dar al-Nafa'is.

al-Bukhari, Abu 'Abd Allah Muhammad bin Isma'il. 2002. *Sahih al-Bukhari*. Cet. ke-2. Beirut: Dar al-Kutub al-'Ilmiyah.

Farahdina Abdul Manaf & Nursiah Sulaiman. 2004. *Peranan Harta Wakaf Dalam Bidang Pembangunan Dan Pendidikan: Fokus dalam Bidang Perubatan*. Koleksi kertas sisipan Seminar Kebangsaan Peranan harta sedekah dalam memartabatkan Pembangunan dan Pendidikan Ummah, pada 13 & 14 Januari 2004, Pusat Pemikiran dan Kefahaman Islam (CITU) UiTM.

Fazlur Rahman.1992. *Kesihatan dan Perubatan Dalam Tradisi Islam*. Wan Mohd. Nor Wan Daud & Shahrul Amar Abdullah (terj.). Kuala Lumpur: Dewan Bahasa dan Pustaka.

Hailani Muji Tahir & Sanep Ahmad. 1986. *Aplikasi Fiqh Muamalat dalam Sistem Kewangan Islam*. Pusat Penerbitan Universiti (UPENA), Universiti Teknologi Mara Shah Alam.

Hasanuddin Ahmed & Ahmedullah Khan. 1997. *Strategies To Develop Waqf Administration in India*. Jeddah: Islamic Development Bank.

http://74.125.153.132/search?q=cache:yp3ahFVPrc8J:202.75.54.218/~jcorp/Publication/File/kenyataan_media.pdf+klinik+waqaf+an+nur+negeri+sembilan&cd=7&hl=en&ct=clnk&gl=my, dilayari pada 12 Jan 2013.

http://lib.ipislam.edu.my/text/wakaf_permaidani.htm, dilayari pada 22 Februari 2014.

http://www.bernama.com/bernama/v3/bm/news_lite.php?id=424814, akses dilayari pada 20 Januari 2014.

<http://www.islamic-relief.com/Waqf/default.aspx?depID=> dilayari pada 17, 20 Mei 2013.

<http://www.jcorp.com.my/waqafannur/page.htm>, 23 Mac 2014.

<http://www.kpihealth.com.my/news-detail.php?id=58> , Dilayari pada 20 Mac 2014.

- <http://www.mainpp.gov.my/artikel/projekmainpp.htm>, 1 Mac 2014.
- <http://www.mais.gov.my/e-pemasaran/wakaf/projek-wakaf.asp> , 20 Mac 2014.
- <http://www.muis.gov.sg/cms/uploadedFiles/MuisGovSG/Wakaf/Wakaf%20jadi%20aset%20terbesar%20Muis.pdf>
- http://www.utusan.com.my/utusan/info.asp?y=2008&dt=0118&pub=Utusan_Malaysia&sec=Dalam_Negeri&pg=dn_09.htm , dilayari pada 9 Mac 2014.
- <http://www.ywm.org.my/index.php/wakaf-tunai-malaysia/>, dilayari pada 2 Mac 2014.
- <https://www.e-wakafjohor.gov.my/index.php?option=news&idnews=4>, dilayari pada 22 Mac 2014.
- Huq, Ataul .1993. *Development and Distribution in Islam*. Petaling Jaya: Pelanduk Publications.
- Ibn ‘Abidin, Muhammad Amin. 1994. *Rad al-Mukhtar ‘Ala al-Durr al-Mukhtar*. Jil. 6. Lubnan: Dar al-Kutub al-‘Ilmiyyah.
- Ibn Manzur, Muhammad Ibn Mukarram.1990. *Lisan Al-Arabi*. Jilid 9. Beirut: Dar Sadr.
- Ibn Qudamah, Abu Muhammad ‘Abd Allah bin Ahmad. 1997. *Al-Mughni*. Jil. 8. Riyadh: Dar ‘Alam al-Kutub.
- Ismail Saad et.al. 1985. *Pengenalan Tamadun Islam Dalam Bidang Perubatan*. Kuala Lumpur: Dewan Bahasa dan Pustaka.
- Jabatan Wakaf, Zakat dan Haji. 2008. *Laporan Tahunan JAWHAR 2007*. Malaysia: JAWHAR.
- Al-Khatib al-Syarbini. 1997. *Mughni al-Muhtaj*. Jil. 2. Beirut: Dar al-Ma‘rifah.
- Majlis Agama Islam Johor. Konsep wakaf tunai. Diakses dari: www.maij.gov.my, pada 3 Mac 2014.
- Majlis Agama Islam Johor. Saham wakaf Johor. Diakses dari: www.maij.gov.my, pada 3 Mac 2014.
- Merriam, S.B. 1998. *Qualitative research and case study applications in education*. Athens: The Jossey-Bass.
- Merriam, S.B. & Associates. 2002. *Qualitative research in practice: Examples for discussion and analysis*. San Franciso, CA: Jossey-Bass.
- Mohamad Akram Laldin, M. Mek Wok and S. Mohd. Fuad. 2008. *Maqasid Syariah Dalam Pelaksanaan Waqaf*. Jurnal Pengurusan Jawhar, Vol 2, Siri 2.

- Mohd Fauzi Mustaffa. 2006. *The role of Generation Endowment Takaful In CashFor New Products Endowments*. Kertas Kerja dibentangkan di National Endowment Convention of 2006 di HotelLegend, Kuala Lumpur, 12 -14 September 2006.
- Muhammad Hisyam Bin Mohamad. 2007. Wakaf Tunai : Pendekatan Terbaik Untuk Mewakafkan Harta Masa Kini. Diakses daripada: www.ikim.gov.my, pada 22 Mac 2014.
- Nooh Gadot. 2006. *Amalan Saham Wakaf Johor*. Kertas Kerja Konvensyen Wakaf 2006 di Hotel Legend, Kuala Lumpur, 12-14 September 2006.
- Osman Sabran. 2002. *Pengurusan Harta Wakaf*. Johor: Penerbit Universiti Teknologi Malaysia.
- Patton, M.Q. 2002. *Qualitative research and evaluation methods*. 3rd edition. Thousand Oaks, CA: Sage Publications.
- Portal Majlis Agama Islam Melaka (MAIM), <http://www.maim.gov.my/www/v1/services.php?ref=services5&nav>, dilayari pada 28 Mac 2014.
- Ritchie, J. & Lewis, J. 2005. *Qualitative research practice: A guide for social science students and researchers*. London: SAGE Publications.
- Sadeq, Abul Hasan Muhammad. 2002. Waqf, Perpetual Charity and Poverty Alleviation. *International Journal of Social Economics*. Vol. 29. No.1/ 2.
- Selangor. 2003. Enakmen Pentadbiran Agama Islam (Negeri Selangor) 2003.
- Siti Mashitoh Mahamod. 2007. Pembentukan Dana Wakaf Menurut Perspektif Syariah Dan Undang-Undang Serta Aplikasinya Di Malaysia. *Jurnal Syariah*. Jil. 15. Bil. 2.
- Siti Mashitoh Mahamood, Asmak Ab Rahman, Azizi Che Seman, Suhaili Sarif dan Nor Aini Ali. 2009. *Konsep Dan Aplikasi Produk Wakaf Kontemporari Di Malaysia: Saham Wakaf Dan Wakaf Saham*. Kertas Kerja Seminar Ekonomi Islam Peringkat Kebangsaan 2009 di Balai Ilmu, Akademi Pengajian Islam Universiti Malaya, 10 dan 11 Februari 2009.
- al-Syawkani, Muhammad bin `Ali (t.t.). *Nayl al-Awtar*. Jil. 6. Qaherah: Maktabah wa Matba`ah Mustafa al-Babi al-Halabi wa Awladihi.
- Wakaf an-Nur Corporation Berhad. 2012. Laporan Tahunan 2012.
- Yayasan Waqaf Malaysia, <http://www.ywm.org.my/index.php/wakaf-tunaimalaysia/>, 20 Januari 2014.
- Zainal Abidin Safarwan. 1995. *Kamus Besar Bahasa Melayu* Kuala Lumpur: Utusan Publication.
- al-Zuhaili, Wahbah. 1989. *al-Fiqh al-Islami Wa Adillatuhu*. Jil.8. Damsyik: Dar al-Fikr.